



Ignacio José Davila Estévez  
Escudería Mix Rally Sports  
Avda. Coruña 327 4ªA  
27003 Lugo

REFª N° expte.: LU-PD- 7/2026  
ASUNTO: Resolución de autorización de proba deportiva dinámica por estrada  
Proba deportiva: **VIII RALLYE MARIÑA LUCENSE**  
Solicitante: Ignacio José Davila Estévez. Escudería Mix Rally Sports  
Data celebración: 8, 9 e 10 de maio de 2026  
Concellos afectados: Burela, Cervo, O Vicedo, Viveiro e Xove

## FEITOS

**Primeiro.-** O 25 de marzo de 2026 recibíuse a solicitude de autorización da proba deportiva “VIII Rallye Mariña Lucense”, que se vai celebrar os días 8, 9 e 10 de maio de 2026. A proba discorrerá polos concellos de Burela, Cervo, O Vicedo, Viveiro e Xove. As vías afectadas son: LU-P-6404, LU-P-6402R, LU-P-6402, LU-P-6401, LU-P-6407, LU-P-1505, LU-P-1504, LU-P-1503, LU-P-2601, LU-P-2607, LU-P-2609, LU-P-2610 e LU-P-6606.

**Segundo.-** O expediente instruíuse coa achega, entre outros, dos seguintes documentos: memoria descritiva da proba, mapa do percorrido, xustificantes dos seguros de responsabilidade civil e de accidentes para a presente proba, servizos sanitarios, regulamento particular da proba, libro de ruta, libro de seguridade e o xustificante de pago da taxa correspondente.

**Terceiro.-** Solicitáronse os preceptivos informes aos organismos titulares das vías polas que discorre a proba (Servizo de Vías e Obras da Deputación Provincial de Lugo), á Xefatura Provincial de Tráfico e aos concellos afectados.

**Cuarto.-** O informe da **Xefatura Provincial de Tráfico** achégase coa presente resolución, que se incorpora como parte da súa motivación.

No informe indícase que *“esta Xefatura Provincial informa favorablemente la celebración de dicho evento siempre que se cumplan todas las prescripciones establecidas en este informe y sus anexos.*

*Prescripciones particulares*

*Por parte del Subsector de Tráfico de Lugo no se aprecian circunstancias que hagan valorar negativamente la celebración del evento, valorando exclusivamente el ámbito de la seguridad vial. Todo ello siempre que la organización se ajuste estrictamente a lo solicitado y se cumplan las normas que sean de aplicación. Se recuerda la importancia de una correcta planificación de los desvíos de circulación, de modo que no se vea restringida la circulación de vehículos atendiendo a su peso o dimensiones. Por parte del Subsector de Tráfico de Lugo, se establecerá un operativo para garantizar la seguridad vial del perímetro exterior de la prueba durante el día 9 de mayo, implicando a 14 efectos de la unidad.”*





**Quinto.-** O informe do **Servizo de Vías e Obras da Deputación Provincial** informa da viabilidade sobre a solicitude para a celebración da proba polas estradas provinciais sinaladas, *"sen prexuízo da posible existencia de defectos no pavimento ou obras nas devanditas estradas, cuxa incidencia na proba deberá valorar o petionario previamente á realización da mesma, debendo realizarse nas condicións que seguidamente se detallan:*

1.- *Deberá actuarse en todo caso conforme ao disposto no R.D. 148/2003, de 21 de novembro, polo que se aproba o Regulamento Xeral de Circulación, concretamente será obrigatorio a observancia e cumprimento dos artigos 15 ao 31 do Anexo II do dito texto legal.*

2.- *Cando, en aplicación do previsto no artigo 91 RXEG 66/2016, se proceda ao corte de vías, deberán sinalizarse o corte e o desvío, así como deixar a estrada e os seus elementos: pavimento, sinais, beiravías, cunetas, etc., nas mesmas condicións previas ao corte, limpas e sen obstáculos nin impedimentos para a circulación. Ao chegar ó lugar do desvío alternativo colocarse un sinal de redución de velocidade a 40 km/h. e outra de dirección obrigatoria, por ambas marxes, colocando permanentemente carteis de "ESTRADA CORTADA, DESVÍO PROVISIONAL" a unha distancia de 50 m.*

3.- *A organización comunicarlle á Administración competente en materia de tráfico, coa máxima antelación posible, todas as limitacións temporais ou permanentes á circulación.*

4.- *Os organizadores serán responsables da sinalización, ordenación da circulación e protección da seguridade civil das actuacións públicas na zona e treito das estradas onde se leve a cabo a dita actividade.*

5.- *Os organizadores deberán establecer os servizos necesarios para previr aos demais usuarios co fin de evitar posibles accidentes, así como cumprir a normativa vixente no Regulamento xeral de circulación (R.D. 1428/2003, do 21 de novembro), sendo responsables de cantos danos e prexuízos pódanse causar ás estradas e usuarios desta por motivo da actividade solicitada, debendo estar en posesión das pólizas de responsabilidade civil que procedan.*

6.- *A Deputación de Lugo NON será responsable dos posibles danos materiais ou persoais que poidan afectar aos participantes, público ou terceiros, derivados do estado das estradas provinciais, así como da falta de sinalización esixida ou do incumprimento das obrigas dos organizadores.*

**Os organizadores durante a celebración de dito evento garantirán, na medida do posible, o acceso ás vivendas, establecementos, así como fincas adxacentes, situadas no tramo das estradas provinciais afectadas.**

7.- *O evento solicitado rexerese en todo momento polo establecido na Lei 10/2017, do 27 de decembro, de espectáculos públicos e actividades recreativas de Galicia.*

*O presente informe emítese en sentido favorable e ten carácter vinculante establecido no punto 1 do artigo 91. Usos especiais da estrada do Regulamento xeral de estradas de Galicia e **non constitúe unha autorización**, a cal corresponde á Consellería da Xunta de Galicia, competente en materia de espectáculos públicos e actividades recreativas, debendo os organizadores obter cantas outras autorizacións e licenzas sexan precisas segundo a lexislación vixente."*

**Sexto.-** Os concellos afectados informaron o seguinte:

- O Concello de Burela resolveu autorizar a celebración da proba polas vías de titularidade municipal.
- O Concello de Cervo manifesta que non pon ningún inconveniente para que a proba transcorra olas vías do concello.
- O Concello do Vicedo emite informe favorable para levar a cabo a proba.
- O Concello de Viveiro emite informe favorable.
- O Concello de Xove informa que a realización da actividade é viable.





## FUNDAMENTOS DE DEREITO

**Primeiro.-** O Real decreto 1640/1996, do 5 de xullo, sobre traspaso de funcións e servizos da Administración do Estado á Comunidade Autónoma de Galicia en materia de espectáculos públicos (BOE núm. 184 do 31 de xullo) e o Decreto 336/1996, do 13 de setembro (DOG núm. 182 do 17 de setembro), sobre asunción de funcións e servizos transferidos á Comunidade Autónoma de Galicia en materia de asociacións e espectáculos públicos e a súa asignación á entón Consellería de Xustiza, Interior e Relacións Laborais.

**Segundo.-** O Anexo II do Real Decreto 1428/2003, do 21 de novembro, polo que se aproba o Regulamento Xeral de Circulación establece no seu artigo 2 que a competencia para expedir a autorización para celebrar probas deportivas que se desenvolvan integramente por vías situadas dentro do ámbito territorial dunha comunidade autónoma, corresponderalle a esa comunidade autónoma.

**Terceiro.-** A Lei 10/2017, do 27 de decembro, de espectáculos públicos e actividades recreativas de Galicia (DOG núm. 1 do 2 de xaneiro de 2018), que establece que lle corresponde á consellería competente en materia de espectáculos públicos e actividades recreativas autorizar a celebración das actividades que se desenvolvan en máis dun termo municipal da Comunidade Autónoma.

**Cuarto.-** O Decreto 98/2020, do 2 de xullo, polo que se regula o procedemento de autorización da celebración de espectáculos públicos e actividades recreativas que se desenvolvan en máis dun termo municipal da Comunidade Autónoma de Galicia (DOG núm. 139, do 14 de xullo), establece no artigo 4.b.) que o órgano competente para outorgar as autorizacións previstas neste decreto é a persoa titular da xefatura territorial correspondente da consellería competente en materia de espectáculos públicos e actividades recreativas, cando se trate de espectáculos públicos e actividades recreativas que se desenvolvan no ámbito territorial da respectiva provincia.

**Quinto.-** Actualmente a competencia recae nos directores/as territoriais da Consellería de Presidencia, Xustiza e Deportes en virtude do Decreto 136/2024, do 20 de maio, polo que se establece a estrutura orgánica da citada consellería (DOG núm. 101 do 27 de maio).

**Sexto.-** A Lei 39/2015, do 1 de outubro, de procedemento administrativo común das Administracións Públicas (BOE núm. 236 de 2 de outubro).

En virtude de todo o exposto,

## RESOLVO

**Autorizar** a celebración da proba deportiva "VIII RALLYE MARIÑA LUCENSE", para os vindeiros días 8, 9 e 10 de maio de 2026. Deberán cumprir as condicións que se sinalan nos informes emitidos.

No suposto de que se acreditase por parte das forzas e corpos de seguridade situacións que comporten un risco grave ou perigo inminente para as persoas e os bens ou a convivencia entre a cidadanía, os axentes poderán adoptar de forma directa, logo do requirimento ás persoas responsables da celebración daqueles e, no caso de que este non sexa atendido, a **suspensión** inmediata do espectáculo ou da





actividade ou aquelas outras medidas que se consideren necesarias, segundo o establecido no artigo 29 da Lei 10/2017, do 27 de decembro, de espectáculos públicos e actividades recreativas de Galicia.

Contra esta resolución poderá interpoñer recurso de alzada ante o Conselleiro de Presidencia, Xustiza e Deportes, no prazo dun mes que comezará a contar a partir do día seguinte ao da notificación desta resolución.

Lugo, na data da sinatura dixital  
O director territorial  
Francisco Javier Vázquez Nodal

